



"Jednog jutra u osvit zore Božiji Poslanik, sallallahu alejhi ve sellem, govorio je o Dedžalu. Govoreći, spuštao je i dizao glas tako da smo pomislili da je Dedžal u prikrajku palmovika..."

Nevas b. Sem'an, radijallahu anhu, rekao je: "Jednog jutra u osvit zore Božiji Poslanik, sallallahu alejhi ve sellem, govorio je o Dedžalu. Govoreći, spuštao je i dizao glas tako da smo pomislili da je Dedžal u prikrajku palmovika. Kada smo mu ponovo došli primjetio je

to na nama, pa nas je upitao: 'Šta vam je?' Rekli smo: 'O Allahov Poslaniče, jutros si spominjao Dedžala dižući i srušavajući glas govoreći o njemu, pa smo pomislili da se on nalazi u prikrajku palmovika.' Rekao je: 'Ja za vas strahujem mimo Dedžala. Ako se pojavi, a ja budem među vama, ja ću ga bez vas pobiti dokazima. A ako se pojavi, a ja

ne budem među vama, svaki čovjek će biti sebi branilac. A Allaha ostavljam kao zaštitnika svakom muslimanu. Dedžal je mladić jako kovrdžave kose, oko mu je bez sjaja, kao da sliči Abduluzzau b. Katunu. Ko ga od vas dočeka neka čita početak sure Kehf. Pojavit će se na putu između Šama i Iraka, pa će i desno i lijevo unositi smutnju. O

Božiji robovi, budite čvrsti.' Upitali smo: 'Božiji Poslaniče koliko će ostati na Zemlji?' Odgovorio je: 'Četrdeset dana. Jeden će dan trajati kao godina, drugi dan kao mjesec, treći dan kao sedmica, a ostali dani trajat će kao ovi vaši dani.' Upitali smo: 'O Božiji Poslaniče, taj dan što traje kao godinu, da li nam je dovoljan u tom danu namaz jednog dana i noći?' 'Ne, nego odredite namaska vremena.' Upitali smo: 'O Božiji Poslaniče, kojom brzinom će se kretati po Zemlji?' Odgovorio je: 'Poput kiše koju vjetar nosi. On će doći jednoj grupi ljudi, pa će ih pozvati, a oni će u njega povjerovati i odazvati mu se. On će narediti nebu, i ono će kišu liti, i Zemlji, koja će biljem obrasti. Ispred njih će prolaziti

njihova stoka visokih grba, nabreklih vimena i punih strukova. I doći će grupi ljudi i pozvati ih. Oni će odbiti njegov poziv, i osvanut će glađu pogodeni, ništa im od imetaka

njihovih neće ostati. Dedžal će proći pored ruševine, pa će joj reći: 'Izbaci svoje zakopano blago!', pa će ga to blago slijediti poput pčela kada slijede matice. Naredit će da se dovede mladić pa će ga udariti sabljom i raspolutit će ga na dva dijela. Zatim će ga pozvati i on će mu doći, a njegovo lice će biti svijetlo i nasmiješeno. Dok oni budu u takvom stanju, Uzvišeni će Allah poslati Isaa, sina Merjeminog, i on će sići kod bijele munare istočno od Damaska, umotan u dvije obojene haljine, s rukama naslonjenim na krila dvaju meleka; kada spusti glavu, sa kose će mu cijediti voda, a kada je podigne, padat će kapi kao da su svijetli biseri. Neće ostati nijedan nevjernik koji osjeti njegov miris, a da neće umrijeti, a njegov miris doseže dokle doseže pogled. Slijedit će Dedžala, stići će ga i ubiti će ga kod vrata Ludda. Zatim će Isa, sallallahu alejhi ve sellem, doći narodu koji je Allah zaštitio od Dedžala te će ih potirati po licima i govoriti im o njihovim

stepenima u džennetu. Dok oni budu u takvom stanju, Uzvišeni Allah će objaviti Isau, sinu Merjeminom, neka je na njega spas: 'Dao sam da se pojave narodi protiv kojih se niko ne može boriti, pa skloni Moje robeve na Tur!' Uzvišeni Allah poslat će Jedžudž i Medžudž, i oni će se niz sve strmine žurno spuštati. Kada prvi od njih dođu na Taberijsko jezero, pit će iz njega a kada dođe zadnji reći će: 'Kao da je ovdje nekada bila voda.' Isa,

alejhis-selam, i njegovi drugovi će biti u teškom stanju, tako da će glavuša vola biti vrednija od stotinu zlatnika nekome od vas danas. Isa, alejhis-selam, i njegovi ashabi će se obratiti Uzvišenom Allahu, pa će Allah na vratove Jedžudža i Medžudža poslati crve, te će rastrgani osvanuti, usmrćeni poput jedne duše. Isa, alejhis-selam, i njegovi ashabi će se spustiti sa brda, a na Zemlji neće naći ni koliko jedan pedalj koji nije ispunjen njihovim leševima i smradom. Isa, alejhis-selam, i njegovi ashabi će se obratiti Uzvišenom Allahu

povodom toga, te će Allah poslati ptice poput devinih vratova koje će ih nositi i baciti tamo gdje to bude Allahova volja.' Zatim će Allah Uzvišeni poslati kišu od koje čovjeka neće moći zaštititi nijedna kuća i građevina, kako one zidane od blata tako i one pravljene od kostrijeti. Ona će saprati i očistiti Zemlju, tako da će biti poput ogledala i gole ledine. Zemlji će biti rečeno: 'Neka tvoji plodovi isklijaju i neka se bereket tvoj poveća!' Tada će

skupine ljudi jesti jedan nar, tražeći hlad pod njegovom korom. Mlijeko će biti blagoslovljeno, tako da će deva muzara biti dovoljna za veliku skupinu ljudi, krava muzara bit će dovoljna za ogrank plemena, a ovca muzara za jednu porodicu. Dok oni budu u takvom stanju, Allah će poslati prijatan vjetar koji će ih uzeti ispod pazuha i uzeti dušu svakom vjerniku i muslimanu. Ostat će samo najgori ljudi, koji će imati snošaj pred ljudima, javno, poput magaraca. Oni će doživjeti Smak svijeta."

[Vjerodostojan] [Hadis bilježi imam Muslim]

Jedan od velikih predznaka Sudnjeg dana jest pojava Dedžala, a to će se desiti onako kako je opisano u ovom hadisu. Sve što je kazano u ovom hadisu jest dio gajba (skrivenog i nama nepoznatog te nepojmljivog svijeta), u koje je obaveza vjerovati, kao što nas je o njima obavijestio Allahov Vjerovjesnik, sallallahu alejhi ve sellem. Poslanik je Dedžala u potpunosti opisao kako bi ga svaki vjernik mogao prepoznati. Allah Uzvišeni dao je Dedžalu mnoge nadljudske sposobnosti kako bi iskušao ljudi. Običi će sva mjesta na Zemlji, osim Meke i Medine, a završit će tako što će ga ubiti Isa, alejhis-selam. Nakon toga će se pojaviti Jedžudž i Medžudž, koji će Zemlju ispuniti neredom. Njihova pojava također je jedan od velikih predznaka Sudnjeg dana. Allahov vjerovjesnik Isa, sallallahu alejhi ve sellem, i vjernici molit će Allaha Uzvišenog da ih spasi od njih, pa će im uslišiti molbe. Nakon ovih velikih predznaka nastupit će Smak svijeta, a prije nego što nastupi Allah Uzvišeni uzet će duše Svojih robova vjernika, te će Smak svijeta doživjeti najgora stvorenja.

<https://sunnah.global/hadeeth/bs/show/6380>

